

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳԻՏՈՒԹՅԱՆ ԵՎ ԿՐԹՈՒԹՅԱՆ ՆԱԽԱՐԱՐՈՒԹՅՈՒՆ

Հայաստանի Պետական ճարտարագիտական Համալսարան
(Պոլիտեխնիկ)

Հաշվողական համակարգերի
մաթեմատիկական ապահովման
ամբիոն

ԲԱԶՄՈՒԹՅՈՒՆՆԵՐԻ ՏԵՍՈՒԹՅՈՒՆ
ԵՎ
ԲԻՆԱՐ ՀԱՐԱԲԵՐՈՒԹՅՈՒՆՆԵՐ

Ուսումնական ձեռնարկ

ԵՐԵՎԱՆ 2009

Կազմող՝ Ե.Ծ.Ավազերդյան

Բազմությունների տեսություն և բինար հարաբերություններ:
Ուսումնական ձեռնարկ
Հայաստանի Պետական ճարտարագիտական Համալսարան
(Պոլիտեխնիկ): Երևան, 2009թ: 40 էջ:

Բազմությունների տեսության և բինար հարաբերությունների վերաբերյալ ուսումնասիրությունը օգտակար է տեխնիկական մասնագիտացմամբ ուսանողների համար և նպատակ ունի նրանց ծանոթացնել բազմազան դիսկրետ կառուցվածքների, նրանց մոդելավորմանն ու կառավարմանը: Բազմության տարրերի միջև առնչությունները ձևակերպվում և արտահայտվում են հարաբերություն ներկայացնող կառուցվածքների միջոցով, որոնք հանդես են գալիս բազմազան ենթատեքստերում:

Բազմությունները կիրառվում են իրարից տարբեր օբյեկտներ խմբավորելու համար, որոնք բազմության ներսում հաճախ նույն հատկություններն ունեն: Բազմությունների և բինար հարաբերությունների լեզուն միջոց է՝ օբյեկտների հավաքածուները ուսումնասիրելու, կազմակերպելու և անհրաժեշտ ձևով դրանք կառավարելու համար:

Գրախոսներ՝

տ.գ.դ., պրոֆ. Մ.Խաչատրյան
ֆիզ.մաթ.գ.դ., պրոֆ. Յու.Մովսիսյան

Խմբագիր՝

Ընդհանուր տեղեկություններ

«Բազմությունների տեսություն և բինար հարաբերություններ» թեմայի շրջանակներում ուսումնասիրվում են առանձին կառուցվածքային միավորների խմբավորման առանձնահատկությունները, այդ խմբավորումների ներկայացման և մշակման եղանակները:

Օբյեկտների միջև բինար հարաբերություններն օգտագործվում են համակարգչային և հեռահաղորդակցական ցանցերի նախագծման, ինչպես նաև տվյալների հենքերում տեղեկատվության գրանցման և որոնման արդյունավետ մեթոդների մշակման համար:

1. Բազմության հասկացություն

Բազմություն ասելով հասկանում ենք օբյեկտների կամ տարրերի որոշակի հավաքածու և համարում ենք բազմությունը տրված, եթե նրա տարրերը միարժեքորեն որոշված են, և դա չի բերում որևէ հակասության: Հետևյալ օրինակները պարզաբանում են դրանց իմաստը:

1. Բնական թվերի բազմությունը: 3-ը պատկանում է այդ բազմությանը, իսկ 0.5-ը չի պատկանում այդ բազմությանը:
2. Եթե P -ն $\{x: x\text{-ը Հայաստանի Հանրապետության գետ է}\}$ բազմությունն է, ապա Ախուրյանը պատկանում է P -ին, իսկ Սենան չի պատկանում P -ին:
3. Ռացիոնալ թվերի բազմությունը: 0.5-ը պատկանում է այդ բազմությանը (այդ բազմության տարր է), իսկ $\sqrt{2}$ -ը չի պատկանում այդ բազմությանը (այդ բազմության տարր չէ):
4. $x^2 - 6x + 9 = 0$ հավասարման լուծումների բազմությունը: 3-ը պատկանում է այդ բազմությանը (այդ բազմության տարր է), իսկ 4-ը չի պատկանում այդ բազմությանը (այդ բազմության տարր չէ):

Բազմությունն անվանենք վերջավոր, եթե գոյություն ունի այնպիսի $n \geq 0$ ամբողջ թիվ այնպես, որ այդ բազմությանը պատկանում են ճիշտ n հատ տարրեր:

A վերջավոր բազմության տարրերի քանակն ընդունված է նշանակել $|A|$: Վերջավոր բազմությունները կարելի է ներկայացնել՝ թվարկելով դրանց տարրերը: Որպես կանոն, վերջավոր բազմությանը պատկանող տարրերն ընդունված է գրանցել երկու ձևավոր փակագծերի միջև և առանձնացնել դրանք ստորակետերով: Օրինակ, $\{1, 2, 3, 4\}$ -ը բազմություն է, որը պարունակում է 1, 2, 3 և 4 բնական թվերը: Հայերենի այբուբենի ձայնավորների բազմությունը կարելի է ներկայացնել որպես $\{ա, ե, է, ը, ի, ո, ու, օ\}$ և այլն:

Բազմությունը նշանակելու համար սովորաբար օգտագործում ենք որևէ լեզվի այբուբենի մեծատառերը: $A = \{\text{մատիտ, գրիչ, տետր, աղյուսակ}\}$ -ը բազմություն է, որի

տարրերը մատիտը, գրիչը, տետրը և աղյուսակն են: Առաջին n դրական ամբողջ թվերի բազմությունը կարելի է նշանակել որպես $\{1, 2, 3, 4, \dots, n\}$: Նման ձևով կարելի է նշանակել նաև անվերջ դրական ամբողջ թվերի բազմությունը՝ $\{1, 2, 3, 4, \dots\}$:

Բազմությունը ներկայացվում է նաև բազմության տարրերի բնորոշիչ հատկության միջոցով: Օր.՝ $C = \{1, 8, 27, \dots, k^3, \dots\}$ -ն ներկայացնում է բոլոր դրական ամբողջ թվերի խորանարդների բազմությունը, իսկ $S = \{1, 4, 9, \dots, n^2\}$ -ը՝ n -ից փոքր կամ հավասար բոլոր դրական ամբողջ թվերի քառակուսիների բազմությունը: Ակնհայտ է, որ բազմության բոլոր տարրերի թվարկումը նպատակահարմար է այն դեպքում, երբ այդ տարրերի քանակը փոքր է կամ էլ վերջիններս կարելի է ներկայացնել մաթեմատիկական մոդելի միջոցով: Օրինակ, օգտվելով նկարագրման նման եղանակից, այնքան էլ հեշտ չէ բնութագրել Հայաստանի Հանրապետության քաղաքացիների բազմությունը, ինչպես նաև բոլորովին անիմաստ է նկարագրել իրական թվերի բազմությունը:

Այսպիսով, ընդհանուր դեպքում բազմությունն առաջադրվում է բնութագրական հատկության ներկայացմամբ, այսինքն՝ հատկություն, որին բավարարում են տրված բազմության և միայն այդ բազմության տարրերը: Ներկայացման համար սովորաբար օգտագործվում են ձևավոր փակագծեր, որոնց ներսում բերվում է բազմությունը նկարագրող բնութագրական հատկությունը: Այսպիսով, $\{x: x \text{ --ը բավարարում է } P \text{ հատկությանը}\}$ բազմությունը ենթադրում է միայն այն տարրերի առկայությունը, որոնք օժտված են P հատկությամբ: Օրինակ՝ $\{x: x \text{ --ը «Արարատ» ֆուտբոլային ակումբի ֆուտբոլիստ է}\}$ բազմությունը բաղկացած է ամբողջ աշխարհի այն և միայն այն ֆուտբոլիստներից, որոնք ընդգրկված են «Արարատ» ֆուտբոլային ակումբում:

Ստորև ներկայացնում ենք բազմությունների տեսության հիմնական գաղափարները և սահմանումները:

Եթե a –ն A բազմության տարրերից մեկն է, ապա ասում ենք, որ a –ն A -ի տարր է, կամ՝ a –ն **պատկանում է**

A -ին: a տարրի պատկանելությունը A բազմությանը գրվում է՝ $a \in A$: Եթե a տարրը չի պատկանում A բազմությանը, ապա այն գրվում է՝ $a \notin A$.

Սահմանում 1.1. A բազմությունը B բազմության ենթաբազմություն է և նշանակվում է՝ $A \subseteq B$, եթե A -ի յուրաքանչյուր տարր B բազմության տարր է: Այսինքն՝ A բազմությանը պատկանող ցանկացած a տարրի համար տեղի ունի նաև $a \in B$: Եթե A բազմությունը B բազմության ենթաբազմություն չէ, ապա այդ գրվում է՝ $A \not\subseteq B$, որը նշանակում է, որ A բազմությանը պատկանում է այնպիսի տարր, որը չի պատկանում B -ին:

Մասնավորապես՝ ամեն մի բազմություն իր ենթաբազմությունն է: Այսպիսով, ունենք. $\{1,2,3\} \subseteq \{1,2,3\}$, $\{1,2,3\} \subseteq \{1,2,3,7,90\}$, $\{1,2,3\} \not\subseteq \{1,3,5,6\}$: Եթե $A = \{x: x\text{-ը համալսարանի ֆուտբոլիստ է}\}$, $B = \{x: x\text{-ը համալսարանի մարզիկ է}\}$, $C = \{x: x\text{-ը համալսարանի ծրագրավորման մրցույթի մասնակից է}\}$, ապա $A \subseteq B$, իսկ $C \not\subseteq B$.

Բազմությունները հավասար են, եթե նրանց պատկանում են միևնույն տարրերը: Եթե $A = \{2,4,6\}$, իսկ $B = \{x: x\text{-ը } 7\text{-ից փոքր դրական զույգ թիվ է}\}$, ապա $A \neq B$:

Այսպիսով, հանգում ենք հետևյալ սահմանմանը.

Սահմանում 1.2. Ենթադրենք, որ A -ն և B -ն բազմություններ են: Ասում են, որ A -ն **հավասար** է B -ին և գրում են՝ $A = B$, եթե կամայական x -ի համար ունենք $x \in A$ այն և միայն այն դեպքում, երբ $x \in B$: Այլ կերպ ասած՝ $A = B$ այն և միայն այն դեպքում, երբ $A \subseteq B$ և $B \subseteq A$. Եթե $A \subseteq B$ և $A \neq B$, ապա ասում են, որ A -ն B -ի **սեփական ենթաբազմությունն** է՝ նշելով $A \subset B$:

Այսպիսով, A և B բազմությունների հավասարությունն ապացուցվում է երկու փուլով.

- 1) ապացուցվում է, որ A -ն B -ի ենթաբազմությունն է,
 - 2) ապացուցվում է, որ B -ն A -ի ենթաբազմությունն է:
- Քանի որ բազմությունը միարժեքորեն բնութագրվում է միայն այն տարրերով, որոնք պատկանում են այդ բազմությանը, ապա տարրերի թվարկման

հաջորդականությունն էական չէ: Օրինակ՝ $\{1,2,3,4\} = \{4,2,3,1\}$:

Ցանկացած տարր կամ պատկանում է տրված բազմությանը, կամ՝ չի պատկանում:

Բազմության տարրերը չեն կրկնվում:

Առանձնակի հետաքրքրություն է ներկայացնում *դատարկ* բազմությունը և *համընդհանուր* կամ որ նույնն է՝ *ունիվերսալ* բազմությունը, որոնց սահմանումները կարելի տալ հետևյալ կերպ.

Սահմանում 1.3. *Դատարկ* է կոչվում այն բազմությունը, որին ոչ մի տարր չի պատկանում: Դատարկ բազմությունը նշանակվում է՝ \emptyset կամ $\{\}$: **Համընդհանուր** կամ **ունիվերսալ** է կոչվում այն բազմությունը, որի համար բոլոր դիտարկվող բազմությունները ենթաբազմություններ են:

Թվերի տեսության մեջ համընդհանուր բազմությունը սովորաբար համընկնում է բոլոր ամբողջ կամ բնական թվերի բազմության հետ: Մաթեմատիկական վերլուծության դեպքում համընդհանուր բազմությունը կարող է լինել բոլոր իրական թվերի կամ *n*-չափանի տարածության բոլոր կետերի բազմությունը: Համընդհանուր **U** բազմությունը դիտարկվում է այն դեպքում, երբ դիտարկվող բոլոր բազմությունները **U**-ի ենթաբազմություններն են:

Ըստ սահմանման, յուրաքանչյուր բազմություն համընդհանուր բազմության ենթաբազմություն է: Դատարկ բազմությունը ցանկացած տրված բազմության ենթաբազմություն է, քանի որ դատարկ բազմության յուրաքանչյուր տարր պատկանում է տրված բազմությանը: Կարելի է ասել, որ դատարկ բազմությունը չունի այնպիսի տարր, որը չի պատկանում տրված բազմությանը:

Սահմանում 2.7. **A** բազմության բոլոր ենթաբազմությունների բազմություն է կոչվում այն բազմությունը, որը բաղկացած է **A** բազմության բոլոր ենթաբազմություններից: Նշանակվում է՝ **P(A)**: Երբեմն այդ բազմությանն անվանում են նաև **A**-ի **Բուլյան**:

Օրինակ, $A = \{1,2,3\}$ բազմության Բուլյանը հետևյալն է.
 $P(A) = \{\emptyset, \{1\}, \{2\}, \{3\}, \{1,2\}, \{2,3\}, \{1,3\}, \{1,2,3\}\}$:

Եթե A -ն պարունակում է 3 տարր, ապա նրա բուլյանը բաղկացած է $2^3 = 8$ տարրերից, կամ, որ նույնն է՝ 8 ենթաբազմություններից:

Ընդհանուր դեպքում, եթե բազմությունը բաղկացած է n տարրերից, ապա նրա բուլյանը պարունակում է 2^n ենթաբազմություններ:

Առաջադրանքներ:

1. Թվարկեք $\{x: x\text{-ն ամբողջ թիվ է և } x^2 < 100\}$ բազմության տարրերը:
2. Թվարկեք $\{x: x\text{-ը } 33 \text{ տարածքում փոխանակվող տարադրամ է}\}$ բազմության տարրերը:
3. Ներկայացրեք $\{a, b, c, d, e, f, g, h, i, j, k, l, m, n, o, p, q, r, s, t, u, v, w, x, y, z\}$ բազմությունը բնութագրական հատկությամբ:
4. Թվարկեք հետևյալ բազմություններից յուրաքանչյուրի ենթաբազմությունները.
 $\{a\}, \{a, b\}, \{a, b, c\}, \emptyset, \emptyset$
5. Որոշեք ո տարրերից բաղկացած բազմության ենթաբազմությունների քանակը:
6. Պարզեք հետևյալ պնդումներից յուրաքանչյուրի իսկությունը.
 $\emptyset \notin \emptyset, \emptyset \subseteq \emptyset, \emptyset \subset \emptyset, \emptyset = \emptyset, \emptyset \supset \emptyset$
7. Պարզեք հետևյալ պնդումներից յուրաքանչյուրի իսկությունը.
 $\{2\} \notin \{2, 3, 4, 5\}, \{2\} \supseteq \{2, 4, 6, 7, 8\}, \emptyset = \{\emptyset\}$
8. Որոշեք հետևյալ բազմություններից յուրաքանչյուրի տարրերի քանակը.
 $\{2, \{3\}, 4, 5, \emptyset\}, \{\{2, \{3\}\}, 4, 5, \emptyset\}, \{2, \{3, 4, 5\}, \emptyset\}$:

2. Գործողություններ բազմությունների հետ

Սահմանում 2.1. A և B բազմությունների **հատում** է կոչվում այն բազմությունը, որը բաղկացած է այն և միայն այն տարրերից, որոնք պատկանում են և՛ A -ին, և՛ B -ին:

A և B բազմությունների հատումը նշանակվում է $A \cap B$: Այս սահմանումը համարժեք է հետևյալ գրառմանը.
 $A \cap B = \{ x: x \in A \text{ և } x \in B \}$:

Օրինակ, եթե $A = \{1, 2, 3, 4, 5\}$ և $B = \{1, 3, 7, 9\}$, ապա $A \cap B = \{1, 3\}$:
Եթե $C = \{x: x\text{-ի հասակը } 180\text{ սմ է}\}$ և $D = \{x: x\text{-ը սիրում է ֆուտբոլ խաղալ}\}$, ապա $C \cap D = \{x: x\text{-ի հասակը } 180\text{ սմ է և սիրում է ֆուտբոլ խաղալ}\}$:

Սահմանենք երեք և ավելի բազմությունների հատումը: Եթե ունենք A_1, A_2, A_3 բազմությունները, ապա դրանց հատումը կարելի է որոշել հետևյալ կերպ. $B = A_1 \cap (A_2 \cap A_3)$: Ակնհայտ է, որ $x \in B$, այն և միայն այն դեպքում, երբ $x \in A_1, x \in A_2$ և $x \in A_3$:

Ընդհանուր դեպքում, երբ $I = \{1, 2, 3, \dots, k\}$, ապա

$$\bigcap_{i \in I} A_i = A_1 \cap A_2 \cap A_3 \cap A_k = \{x: x \in A_i \text{ բոլոր } i \in I \text{ համար}\}$$

Սահմանում 2.2. Բազմությունների **միավորում** կոչվում է այն բազմությունը, որը բաղկացած է բոլոր այն տարրերից, որոնք պատկանում են տրված բազմություններից գոնե մեկին:

Բազմությունների միավորումը նշանակվում է՝ $A \cup B$: Այս սահմանումը համարժեք է հետևյալ գրառմանը.
 $A \cup B = \{ x: x \in A \text{ կամ } x \in B \}$

Օրինակ՝ եթե $A = \{1, 2, 6, 7\}$, $B = \{2, 3, 5, 6\}$, ապա $A \cup B = \{1, 2, 3, 5, 6, 7\}$: $A \cup B$ միավորումը կազմվում է A -ի և B -ի տարրերի համատեղմամբ, կրկնվող տարրերից վերցնելով մեկական մնուշ: Հիշենք, որ, ըստ սահմանման, բազմության տարրերը չեն կրկնվում: Եթե $C = \{ x: x\text{-ը բուլիի ուսանող է}\}$ և $D = \{ x: x\text{-ը գորակոչիկ է}\}$, ապա $C \cup D = \{ x: x\text{-ը ուսանող է կամ գորակոչիկ է}\}$:

Սահմանում 2.3. Երկու բազմություններ կոչվում են **տարանջատ**, եթե նրանց հատումը դատարկ բազմություն է:

Օրինակ. Ենթադրենք $A=\{1,3,5,7,9\}$, $B=\{2,4,6,8,10\}$:
Քանի որ $A \cap B = \emptyset$, ուրեմն՝ A -ն և B -ն տարանջատ են:

Հաճախ անհրաժեշտ է գտնել միավորումից առաջացած բազմությունների տարրերի քանակը: Նկատենք, որ $|A|+|B|$ -ի արդյունքում հաշվվում է A -ի և B -ի իրարից տարբեր տարրերը մեկ, իսկ կրկինվող տարրերը՝ երկու անգամ: Ուստի, եթե արդյունաբար բազմությամբ տարրերի ընդհանուր քանակից հանենք կրկինվող տարրերի քանակը, ապա $A \cup B$ տարրերը կհաշվվեն մեկ անգամ: Այսպիսով՝


$$|A \cup B| = |A| + |B| - |A \cap B|:$$

Այս սկզբունքի ընդհանրացումը կամայական թվով բազմությունների համար կոչվում է **ներառման - բացառման սկզբունք**, որը կարևոր հմտություն է համարակալման բնագավառում:


Սահմանում 2.4. A և B բազմությունների **տարբերություն** է կոչվում այն $A-B$ բազմությունը, որի տարրերը պատկանում են A -ին և չեն պատկանում B -ին:
 $A-B = \{x | x \in A \text{ և } x \notin B\}$:

Սահմանում 2.5. A և B բազմությունների **համաչափ տարբերություն** է կոչվում այն $A \Delta B$ բազմությունը, որի տարրերը պատկանում են կամ A -ին, կամ B -ին, բայց ոչ՝ A -ին և B -ին միաժամանակ: $A \Delta B = (A-B) \cup (B-A)$:

Նկար 3-ում բերված Վեննի գծապատկերի ստվերագծված մասը ներկայացնում է A և B բազմությունների տարբերությունը, իսկ U -ն ներկայացնում է համընդհանուր բազմությունը:



Նկ. 3. A և B բազմությունների տարբերության Վեննի գծապատկեր



Նկ. 4. A բազմության լրացման Վեննի գծապատկեր

Օրինակներ.

1. $\{1,3,5\}$ և $\{1,2,3\}$ բազմությունների տարբերությունը $\{5\}$ բազմությունն է: Այսինքն՝ $\{1,3,5\} - \{1,2,3\} = \{5\}$. Իսկ $\{2\}$ բազմությունը $\{1,2,3\}$ և $\{1,3,5\}$ բազմությունների տարբերությունն է:

2. Ճարտարագիտական համալսարանի Հաշվողական տեխնիկայի ֆակուլտետի ուսանողների բազմության և մաթեմատիկայի օլիմպիադայի մասնակից ուսանողների բազմության տարբերությունը այն ուսանողների բազմությունն է, որոնք համալսարանի Հաշվողական տեխնիկայի ֆակուլտետի ուսանողներ են, սակայն չեն մասնակցել մաթեմատիկայի օլիմպիադային:

Եթե համընդհանուր բազմությունը որոշված է, ապա կարելի է սահմանել բազմության լրացումը:

Սահմանում 2.6. Եթե U -ն համընդհանուր բազմությունն է, ապա $\sim A$ –ն A -ի **լրացումն** է U բազմության նկատմամբ: Այլ կերպ ասած՝ A բազմության լրացումը $U-A$ բազմությունն է:

Որևէ տարր պատկանում է $\sim A$ -ին այն և միայն այն դեպքում, երբ $x \notin A$. Սա նշանակում է՝ $\sim A = \{x | x \notin A\}$.

Նկար 4-ում ստվերագծված տիրույթը ներկայացնում է $\sim A$ բազմությունը:
Օրինակներ.

1. Ենթ. $A = \{ա, գ, ե, է, թ, ի, խ, կ, ծ, ճ, մ, ն, շ, ո, չ, պ, ջ, ռ, ֆ\}$, իսկ համընդհանուր բազմությունը հայերեն այբուբենի փոքրատառերի բազմությունն է: Այդ դեպքում $\sim A$ -ն $\{բ, դ, զ, ը, ժ, լ, ծ, հ, ղ, յ, ս, վ, տ, ր, ց, ու, փ, ք, ն, օ\}$ բազմությունն է:

2. Եթե A -ն 10-ից մեծ բոլոր դրական ամբողջ թվերի բազմությունն է, ապա $\{1, 2, 3, 4, 5, 6, 7, 8, 9, 10\}$ բազմությունը A բազմության լրացումն է՝ պայմանով, որ համընդհանուր բազմությունը բոլոր բնական թվերի բազմությունն է:

3. Բազմությունների նույնական ձևափոխություններ

Ստորև աղյուսակում բերված են բազմությունների ամենակարևոր նույնական ձևափոխությունները:

Աղյուսակ

Նույնություն	Վնուն
$A \cup \emptyset = A$ $A \cup U = U$	Նույնական օրենքներ
$A \cup U = U$ $A \cap \emptyset = \emptyset$	Գերակայության օրենքներ
$A \cup A = A$ $A \cap U = A$	Անգործության օրենքներ
$\overline{(\overline{A})} = A$	Լրացման օրենքներ
$A \cup B = B \cup A$ $A \cap B = B \cap A$	Տեղափոխելիության օրենքներ
$A \cup (B \cap C) = (A \cup B) \cap C$ $A \cap (B \cup C) = (A \cap B) \cup C$	Ջուզորդականության օրենքներ

$A \cap (B \cup C) = (A \cap B) \cup (A \cap C)$ $A \cup (B \cap C) = (A \cup B) \cap (A \cup C)$	Բաշխական օրենքներ
$\overline{A \cup B} = \overline{A} \cap \overline{B}$ $\overline{A \cap B} = \overline{A} \cup \overline{B}$	Դե Մորգանի օրենքներ

4.Ընդհանրացված միավորումներ և հատումներ

Քանի որ բազմությունների միավորումը և հատումը բավարարում են զուգորդականության օրենքին, ապա $A \cup B \cup C$ և $A \cap B \cap C$ բազմությունները հստակ որոշված են, եթե A -ն, B -ն և C -ն բազմություններ են: Նկատենք, որ $A \cup B \cup C$ -ին պատկանում են այն տարրերը, որոնք պատկանում են A, B և C բազմություններից գոնե մեկին, իսկ $A \cap B \cap C$ -ին պատկանում են այն տարրերը, որոնք պատկանում են A -ին, B -ին և C -ին:

Օրինակ. ենթադրենք, $A = \{0, 2, 4, 6, 8\}$, $B = \{0, 1, 2, 3, 4\}$, իսկ $C = \{0, 3, 6, 9\}$. Որոշել $A \cup B \cup C$ և $A \cap B \cap C$:

Լուծում. $A \cup B \cup C$ -ն պարունակում է այն տարրերը, որոնք պարունակվում են A, B և C բազմություններից գոնե մեկում: Ուստի՝ $A \cup B \cup C = \{0, 1, 2, 3, 4, 6, 8, 9\}$:

Նկատենք, որ $A \cap B \cap C$ -ին պատկանում են այն տարրերը, որոնք պատկանում են տրված բոլոր երեք բազմություններին: Ուստի $A \cap B \cap C = \{0\}$:

Դիտարկենք կամայական թվով բազմությունների միավորումն ու հատումն օգտագործելով հետևյալ սահմանումները:

Սահմանում 4.1. Բազմությունների հավաքածուի միավորումը մի այնպիսի բազմություն է, որի տարրերը պատկանում են հավաքածուի գոնե մեկ բազմությանը:

A_1, A_2, \dots, A_n բազմությունների միավորումը ներկայացվում է՝

$$A_1 \cup A_2 \cup \dots \cup A_n = \bigcup_{i=1}^n A_i$$

Սահմանում 4.2. Բազմությունների հավաքածուի հատումը մի այնպիսի բազմություն է, որի տարրերը պատկանում են հավաքածուի բոլոր բազմություններին:

A_1, A_2, \dots, A_n բազմությունների հատումը ներկայացվում է՝

$$A_1 \cap A_2 \cap \dots \cap A_n = \bigcap_{i=1}^n A_i$$

Օրինակ. Ենթադրենք, $A_i = \{i, i+1, i+2, \dots\}$. Այդ դեպքում՝

$$\bigcup_{i=1}^n A_i = \bigcup_{i=1}^n \{i, i+1, i+2, \dots\} = \{1, 2, 3, \dots\}$$

և

$$\bigcap_{i=1}^n A_i = \bigcap_{i=1}^n \{i, i+1, i+2, \dots\} = \{n, n+1, n+2, \dots\} = A_n$$

Առաջադրանքներ

1. Ապացուցել, որ եթե A -ն և B –ն բազմություններ են, ապա

ա) $A - B = A \cap \overline{B}$, բ) $(A \cap B) \subseteq A$, գ) $A \subseteq (A \cup B)$,

դ) $A - B \subseteq A$:

2. Ինչ կարող եք ասել A և B բազմությունների վերաբերյալ, եթե

$$A \oplus B = A?$$

Սահմանում 2.8. A և B բազմությունների **դեկարտյան արտադրյալ** է կոչվում $\{(a, b) | a \in A \text{ և } b \in B\}$ բազմությունը: Այն նշանակվում է $A \times B$, իսկ (a, b) զույգը կոչվում է **կարգավոր զույգ**, որի առաջին բաղադրիչը a է, իսկ երկրորդ բաղադրիչը՝ b :

(a, b) և (a_1, b_1) կարգավոր զույգերը կհամարենք իրար հավասար և կգրենք՝ $(a, b) = (a_1, b_1)$ այն և միայն այն դեպքում, երբ նրանց համապատասխան բաղադրիչները միմյանց հավասար են: $((a, b) = (a_1, b_1)) \rightarrow (a = a_1 \text{ և } b = b_1)$:

$A \times B$ բազմությունը բաղկացած է բոլոր այն կարգավոր զույգերից, որոնց առաջին բաղադրիչը A բազմության տարր է, իսկ երկրորդ բաղադրիչը՝ B բազմության: Ըստ էության, դա նույն կարգավոր զույգն է, որը մենք սովորաբար օգտագործում ենք հանրահաշվում: Բաղադրիչների կարգը զույգի ներսում կարևոր է: Ֆունկցիայի գրաֆիկի պատկերման ժամանակ մենք հստակ գիտենք, որ $(1,2)$ կետը չի համընկնում $(2,1)$ կետի հետ:

Եթե տրված է, որ $A=\{1,2,3\}$, $B=\{s,r\}$, ապա $A \times B = \{(1,s), (1,r), (2,s), (2,r), (3,s), (3,r)\}$:

Օրինակներ.

1. A -ն իրական թվերի բազմությունն է, և $B=A$: Այս դեպքում $A \times B$ -ն իրական թվերի բազմության բոլոր հնարավոր (x,y) կարգավոր զույգերի բազմությունն է, այսինքն՝ $A \times B$ -ն կարելի է պատկերել որպես կոորդինատային հարթության կետերի բազմություն:

2. Եթե $A=[0,1]$ և $B=[1,2]$, ապա $A \times B$ -ն կոորդինատային հարթության $\{(x,y):(0 \leq x \leq 1), (1 \leq y \leq 2)\}$ միավոր կողմով քառակուսու կետերի բազմությունն է:

Ցանկացած A, B և C բազմությունների համար ստույգ է հետևյալ պնդումներից յուրաքանչյուրը.

- $(A \times B = B \times A)$ –ից հետևում է՝ $(A=B)$ կամ $(A=\emptyset)$ կամ $(B=\emptyset)$
- $(A \cup B) \times C = (A \times C) \cup (B \times C)$
- $(A \cap B) \times C = (A \times C) \cap (B \times C)$
- $(A \setminus B) \times C = (A \times C) \setminus (B \times C)$
- $(A_1 \cap A_2) \times (B_1 \cap B_2) = (A_1 \times B_1) \cap (A_2 \times B_2)$

Եթե A բազմությունը բաղկացած է n տարրերից, իսկ B -ն՝ m տարրերից, ապա $A \times B$ -ն պարունակում է $n \times m$ քանակի տարրեր: Մասնավոր դեպքում, երբ A և B բազմություններից որևէ մեկը դատարկ բազմություն է, ապա դրանց դեկարտյան արտադրյալը նույնպես դատարկ բազմություն է:

Առաջադրանքներ:

1. Որոշել $P(A)$ -ն, եթե $A=\emptyset$.
2. Որոշել $P(A)$ -ն, եթե $A=\{\emptyset, \{\emptyset\}\}$.

3. Որոշել $P(P(A))$ -ն, եթե $A = \{\emptyset, \{\emptyset\}\}$.
4. Որոշել հետևյալ պնդումների իսկությունը.
 ա) $A \cap \emptyset = A$ բ) եթե $A \subseteq B$, ապա $A \cap B = A$.
 գ) եթե $A \cap B = A$, ապա $B \subseteq A$.

5. Բինար հարաբերություններ

Սահմանում 5.1. Ենթ. ունենք A և B բազմություններ: $A \times B$ դեկարտյան արտադրյալի $R \subseteq A \times B$ ենթաբազմությունն անվանենք **բինար հարաբերություն** A -ից B :
 A և B բազմությունները կոչվում են $R \subseteq A \times B$ բինար հարաբերության հենքային բազմություններ:

Այլ կերպ ասած՝ A -ից B բինար հարաբերությունը կարգավոր զույգերի R բազմություն է, որում յուրաքանչյուր կարգավոր զույգի առաջին տարրն ընտրված է A բազմությունից, իսկ երկրորդ տարրը՝ B բազմությունից:

Նշելու համար, որ $(a, b) \in R$, օգտագործում ենք aRb

գրառումը: Նշելու համար, որ $(a, b) \notin R$, գրում ենք՝ $a \overline{R} b$:
 Երբ (a, b) –ն պատկանում է R -ին, ապա ասում ենք, որ a -ն առնչվում է b -ին՝ R եղանակով:

Բինար հարաբերությունները ներկայացնում են առնչությունների երկու բազմությունների տարրերի միջև:

Ենթադրենք՝ տրված են $A = \{1, 2, 3\}$ և $B = \{c, d\}$ բազմությունները: Դրանց դեկարտյան արտադրյալը՝ $A \times B = \{(1, c), (1, d), (2, c), (2, d), (3, c), (3, d)\}$: Այդ դեպքում՝ $R = \{(1, d), (2, d), (3, c)\}$ –ը բինար հարաբերություն է A -ից B :

Սահմանում 5.2. A -ից B բինար հարաբերության **որոշման տիրույթը**՝ D_R , բոլոր այն $a \in A$ տարրերի բազմությունն է, որոնց համար գոյություն ունեն $b \in B$ տարրեր այնպես, որ $(a, b) \in R$: A -ից B բինար հարաբերության **արժեքների բազմությունը**՝ E_R , բոլոր այն $b \in B$ տարրերի բազմությունն է, որոնց համար գոյություն ունեն $a \in A$ տարրեր այնպես, որ $(a, b) \in R$:

Ներկայացնենք բինար հարաբերությունների որոշ օրինակներ:

1. Ենթադրենք, A -ն երկրորդ կուրսի ուսանողներ են, իսկ B -ն առարկայացանկն է: Ենթադրենք նաև, որ R -ը բաղկացած է այնպիսի (a, b) զույգերից, որոնցում a -ն

ուսանող է՝ առնչված b առարկայի հետ. Օրինակ, եթե առարկայացանկը $\{CS510, CS518\}$ բազմությունն է՝ համապատասխանաբար “Դիսկրետ մաթեմատիկա” և “Տվյալների կառուցվածքներ” ուսումնական առարկաներով, ապա (Կիրակոսյան Լևոն, CS518) և (Հակոբյան Լուսինե, CS518) զույգերը պատկանում են R -ին: Եթե Կիրակոսյան Լևոնը ներգրավված է նաև CS510 -ում, իսկ Հակոբյան Լուսինեն ներգրավված չէ CS510-ում, ապա (Հակոբյան Լուսինե, CS510) զույգը R -ին չի պատկանում:

2. Ենթադրենք՝ A -ն Հայաստանի բոլոր քաղաքների բազմությունն է, իսկ B -ն՝ Հայաստանի մարզերի բազմությունը: Որոշենք R հարաբերությունը, սահմանելով, որ (a, b) -ն պատկանում է R -ին, եթե a քաղաքը b մարզում է: Ակնհայտ է, որ (Գյումրի, Շիրակ), (Աշտարակ, Արագածոտն), (Արմավյան, Կոտայք), (Ջրվեժ, Կոտայք) և (Կապան, Սյունիք) զույգերը պատկանում են R -ին:

3. Ենթադրենք ունենք՝ $A = \{0, 1, 2\}$, իսկ $B = \{a, b\}$. Այդ դեպքում $\{(0, a), (0, b), (1, a), (2, b)\}$ -ն բինար հարաբերություն է A և B միջև: Սա նշանակում է, որ ORa , իսկ IRb :

4. Փոքր է հարաբերությունը բնական թվերի միջև. $A = B = \mathbb{N}$, $aRb \rightarrow a < b$:

5. Փոքր կամ հավասար է հարաբերությունը ռացիոնալ թվերի միջև. $A = B = \mathbb{R}$, $aRb \rightarrow a \leq b$:

6. Ծանոթ է հարաբերությունը մարդկանց P բազմության միջև. $A = B = P$, $aRb \rightarrow a$ -ն ծանոթ է b -ին:

7. Որդի է հարաբերությունը մարդկանց P բազմության միջև. $A = B = P$, $aRb \rightarrow a$ -ն b -ի որդին է:

8. A -ն Հայաստանի բոլոր քաղաքների բազմությունն է, B -ն Հայաստանի մարզերի բազմությունը, R -ը՝ $a \in A$ -ն ապրում է $b \in B$ մարզում:

9. A -ն Հայաստանի բոլոր քաղաքների բազմությունն է, B -ն՝ Հայաստանի մարզերի բազմությունը, R -ը՝ $a \in A$ -ն և $b \in A$ -ն ունեն մույն $b \in B$ մարզի հողատարածքի սեփականության վկայագրեր:

Բինար հարաբերությունները կարելի է նաև գրաֆիկորեն ներկայացնել սլաքների միջոցով, որոնք միացնում են առաջին բազմության տարրերը երկրորդ բազմության տարրերին, եթե, իհարկե, այդ տարրերի միջև առնչություններ կան:

Գոյություն ունի բինար հարաբերությունների ներկայացման նաև աղյուսակային եղանակ, որտեղ

թվարկվում են հարաբերությանը պատկանող բոլոր կարգավոր զույգերը:

Դիցուք $R \subseteq A \times B$ և $S \subseteq A \times B$: Քանի որ հարաբերությունը բազմությունների դեկարտյան արտադրյալի ենթաբազմություն է, ուստի բնական են հետևյալ սահմանումները.

ա) \bar{R} -ն անվանենք R հարաբերության լրացում կամ նրա հակադիր հարաբերություն.

$$aRb \rightarrow (a \in A) \wedge (b \in B) \wedge (a, b) \notin R,$$

բ) $R \cup S$ -ն անվանենք R և S հարաբերությունների միավորում.

$$a(R \cup S)b \rightarrow aRb \text{ կամ } aSb,$$

գ) $R \cap S$ -ն անվանենք R և S հարաբերությունների հատում.

$$a(R \cap S)b \rightarrow aRb \text{ և } aSb,$$

դ) $R \setminus S$ -ն անվանենք R և S հարաբերությունների տարբերություն

$$a(R \setminus S)b \rightarrow aRb \text{ և } a \notin Sb:$$

Սահմանում 5.3. Ենթ. R -ը հարաբերություն է A -ից B : Այդ դեպքում կարելի է սահմանել B -ից A հարաբերությունը որպես $R^{-1} = \{(b, a) : (a, b) \in R\}$

Այլ կերպ ասած, $(b, a) \in R^{-1}$ այն և միայն այն դեպքում, երբ $(a, b) \in R$, որը հավասարազոր է հետևյալին. $bR^{-1}a$ տեղի ունի այն և միայն այն դեպքում, երբ տեղի ունի aRb : R^{-1} հարաբերությունը կոչվում է տրված R հարաբերության նկատմամբ **հակադարձ հարաբերություն** կամ **R հարաբերության շրջում**:

Օրինակներ.

1. Ենթադրենք տրված է՝ $R = \{(1, r), (2, s), (3, s)\}$: Այդ դեպքում $R^{-1} = \{(r, 1), (s, 2), (s, 3)\}$:
2. Եթե $R = \{(x, y) : x\text{-ը } y\text{-ի հայրն է}\}$, ապա R^{-1} -ը կներկայացնի $R = \{(y, x) : y\text{-ը } x\text{-ի հայրն է}\}$:
3. Փոքր է հարաբերության շրջումը մեծ է հարաբերությունն է:
4. Փոքր է հարաբերության լրացումը մեծ է կամ հավասար հարաբերությունն է:
5. Նախնիներ հարաբերության շրջումը հետնորդներ հարաբերությունն է:

6. Նկատենք, որ *բարեկամ* կամ *ընկեր* հարաբերությունների շրջումը նույն *բարեկամ* կամ *ընկեր* հարաբերություններն են:

7. $R = \{(x, y) : x^2 + y^2 = 4\}$ հարաբերության համար $R = R^{-1}$:

8. Ենթադրենք տրված են երկու $A = \{1, 2, 3\}$ և $B = \{1, 2, 3, 4\}$ բազմությունները և դրանց համար սահմանված հետևյալ հարաբերությունները.

$$R_1 = \{(1, 1), (2, 2), (3, 3)\}, \text{ իսկ } R_2 = \{(1, 1), (1, 2), (1, 3), (1, 4)\} :$$

Այդ դեպքում՝

$$R_1 \cup R_2 = \{(1, 1), (1, 2), (1, 3), (1, 4), (2, 2), (3, 3)\}$$

$$R_1 \cap R_2 = \{(1, 1)\},$$

$$R_1 - R_2 = \{(2, 2), (3, 3)\},$$

$$R_2 - R_1 = \{(1, 2), (1, 3), (1, 4)\}$$

Սահմանում 5.4. Ենթ. ունենք $R \subseteq A \times B$ և $S \subseteq B \times C$: R և S **հարաբերությունների արտադրյալ** է կոչվում այն T հարաբերությունը A և C տարրերի միջև, որը որոշվում է հետևյալ եղանակով.
 $aTc \rightarrow \exists b(b \in B) : (aRb \text{ և } bSc)$:

R և S հարաբերությունների արտադրյալը սահմանվում է, երբ R հարաբերության երկրորդ հենքային բազմությունը համընկնում է S հարաբերության առաջին հենքային բազմության հետ: Հետևաբար, ընդհանուր դեպքում հարաբերությունների արտադրյալը տեղափոխելի չէ. $RS \neq SR$, քանի որ հնարավոր է, որ RS -ը սահմանված լինի, իսկ SR -ը՝ ոչ: Նույնիսկ այն դեպքում, երբ $A=B=C$, միևնույն է՝ R և S հարաբերությունների արտադրյալը կարող է տեղափոխելի չլինել:

Այսպես, օրինակ՝

$A=B=C=[0, 1]$, իսկ R և S որոշված են հետևյալ եղանակով.

$$aRb \Leftrightarrow (0 \leq a \leq 1) \text{ և } (0 \leq b \leq \frac{1}{2});$$

$$aSb \Leftrightarrow (0 \leq a \leq \frac{1}{2}) \text{ և } (0 \leq b \leq 1):$$

Հեշտ է ստուգել, որ

$$RS = \{ (x,y): 0 \leq x \leq 1, 0 \leq y \leq 1 \};$$

$$SR = \{ (x,y): 0 \leq x \leq \frac{1}{2}, 0 \leq y \leq \frac{1}{2} \};$$

Վերջավոր հենքային բազմությունների դեպքում $R \subseteq A \times B$ բինար հարաբերությունը հաճախ կնկարագրենք 0,1 տարրերից $M(R)$ մատրիցի միջոցով: Դիցուք $A = \{a_1, a_2, \dots, a_m\}$, $B = \{b_1, b_2, \dots, b_n\}$ և $R \subseteq A \times B$:

Սահմանենք $R_{ij} \in \{0,1\}$ թվերը: $(R_{ij}=1) \Leftrightarrow (a_i R b_j)$, $1 \leq i \leq m, 1 \leq j \leq n$:

$M(R) = M(R_{ij})$ մատրիցը կանվանենք R բինար հարաբերությանը համապատասխանող մատրից:

Առաջարկում ենք ինքնուրույն համոզվել, որ բինար հարաբերությունների հետ սահմանված գործողությունները կարելի է ներկայացնել որպես գործողություններ համապատասխան մատրիցների հետ, որոնց իրացումն ու ընկալումը ավելի դյուրին է և հեշտ ընկալելի:

Այսպես օրինակ, եթե $R \subseteq A \times B$, $S \subseteq B \times C$ և $A = \{a_1, a_2, \dots, a_n\}$, $B = \{b_1, b_2, \dots, b_n\}$, $C = \{c_1, c_2, \dots, c_n\}$, ապա $M(RS) = M(Y)$ մատրիցի $Y_{ij} \in \{0,1\}$ տարրերը հաշվվում են հետևյալ կանոնով.

$$(Y_{ij}=1) \Leftrightarrow \left(\sum_{k=1}^n R_{ik} S_{kj} > 0 \right) \quad i = 1, 2, \dots, n, \quad j = 1, 2, \dots, q:$$

6. Հարաբերությունների հատկությունները

Այժմ դիտարկենք այնպիսի հարաբերություններ, որոնք տրված են A բազմության մեջ: Ակնհայտ է, որ այս դեպքում հարաբերության հենքային բազմությունները նույնն են: $R \subseteq A \times A$ հարաբերությունն անվանենք **համասեռ հարաբերություն**:

$A \times A$ բազմության $\{(x,x): x \in A\}$ ենթաբազմությունն անվանենք *անկյունագիծ* և նշանակենք i_A :

Սահմանենք համասեռ հարաբերությունների մի քանի դասեր.

Սահմանում 6.1. A բազմության վրա սահմանված R հարաբերությունը կոչվում է **անդրադարձ**, եթե $i_A \subseteq R$, կամ որ նույնն է, եթե ստույգ է $\forall a(a \in A)(a, a) \in R$ պնդումը:

Սահմանումից երևում է, որ A բազմության վրա սահմանված R հարաբերությունն անդրադարձ է, եթե A բազմության յուրաքանչյուր տարր, առանց բացառության, հարաբերության մեջ է ինքն իր հետ: Հետևյալ օրինակները ցուցադրում են այդ հատկությունը:

Օրինակներ

1. $\{1, 2, 3, 4\}$ բազմության վրա սահմանված են հետևյալ հարաբերությունները: Այդ ցուցակից առանձնացնենք այն հարաբերությունները, որոնք անդրադարձ են:

$$R_1 = \{(1, 1), (1, 2), (2, 1), (2, 2), (3, 4), (4, 1), (4, 4)\}$$

$$R_2 = \{(1, 1), (1, 2), (2, 1)\}$$

$$R_3 = \{(1, 1), (1, 2), (1, 4), (2, 1), (2, 2), (3, 3), (4, 1), (4, 4)\}$$

$$R_4 = \{(2, 1), (3, 1), (3, 2), (4, 1), (4, 2), (4, 3)\}$$

$$R_5 = \{(1, 1), (1, 2), (1, 3), (1, 4), (2, 2), (2, 3), (2, 4), (3, 3), (3, 4), (4, 4)\}$$

$$R_6 = \{(3, 4)\}:$$

Լուծում: R_3 և R_5 հարաբերություններն անդրադարձ են, քանի որ (a, a) տեսակի բոլոր զույգերը՝ $(1, 1), (2, 2), (3, 3)$ և $(4, 4)$, նշված երկու հարաբերություններին էլ պատկանում են: Մյուս հարաբերություններն անդրադարձ չեն, քանի որ վերոհիշյալ կարգավոր զույգերը դրանց չեն պատկանում:

Մասնավորապես, R_1, R_2, R_4 և R_6 հարաբերություններն անդրադարձ չեն, քանի որ $(3, 3)$ զույգը նշված երեք բազմություններում էլ բացակայում է:

2. Արդյոք “բաժանարար է” հարաբերությունն անդրադարձ հարաբերություն է դրական թվերի բազմության վրա:

Լուծում. Քանի որ $a|a$ բոլոր դրական a -երի համար, ապա “բաժանարար է” հարաբերությունը դրական թվերի բազմության վրա անդրադարձ հարաբերություն է:

Չետևանք 6.1.1. A բազմության վրա սահմանված R հարաբերությունը կոչվում է **ոչ անդրադարձ**, եթե $(a,a) \in R$ ոչ բոլոր $a \in A$ համար:

Չետևանք 6.1.2. A բազմության վրա սահմանված R հարաբերությունը կոչվում է **հակաանդրադարձ**, եթե $(a,a) \notin R$ բոլոր $a \in A$ համար:

Որոշ հարաբերությունների դեպքում հարաբերության զույգի առաջին տարրը հարաբերում է երկրորդ տարրին այն և միայն այն դեպքում, երբ երկրորդ տարրը հարաբերում է առաջին տարրին: Օրինակ, ուսանողների համար սահմանված հետևյալ հարաբերության մեջ, երբ (x,y) զույգը ներկայացնում է միևնույն խմբի ուսանողներին, այդ հարաբերությունը բավարարում է վերոհիշյալ հատկությանը:

Սահմանում 6.2. A բազմության վրա սահմանված R հարաբերությունը կոչվում է **համաչափ**, եթե $R^{-1} = R$, կամ որ նույնն է, եթե ստույգ է $(b,a) \in R$ բոլոր $(a,b) \in R$ համար: Այլ կերպ ասած՝ $(a,b) \in R \rightarrow (b,a) \in R$, կամ որ նույնն է՝ $aRb \rightarrow bRa$:

Չետևանք 6.2.1. Եթե վերոհիշյալ պայմանը տեղի ունի ոչ բոլոր $(a,b) \in R$ համար, ապա համասեռ հարաբերությունը **ոչ համաչափ** է:

Որոշ բինար հարաբերություններ օժտված են այնպիսի հատկությամբ, որ եթե որևէ տարր հարաբերության մեջ է երկրորդի հետ, այնուամենայնիվ, երկրորդը հարաբերության մեջ չէ առաջինի հետ: Օրինակ, հարաբերությունը, որը բաղկացած է այնպիսի (x,y) զույգերից, որոնցում x -ը և y -ը ձեր համալսարանի այն ուսանողներն են, որոնց համար ծիշտ է, որ x ուսանողի միջին առաջադիմությունը բարձր է y ուսանողի միջին առաջադիմությունից, ներկայացնում է հենց այդպիսի հարաբերություն:

Չետևանք 6.2.2. A բազմության վրա սահմանված R հարաբերությունը կոչվում է **հակահամաչափ**, եթե $R \cup R^{-1} \subseteq i_A$, այլ կերպ ասած՝ $\{(a,b) \in R \text{ և } (b,a) \in R\} \rightarrow a = b$:

Հարաբերությունը հակահամաչափ է այն և միայն այն դեպքում, եթե հարաբերությունը չի պարունակում իրարից տարբեր այնպիսի a և b տարրեր, որ a -ն հարաբերության մեջ լինի b -ի հետ, իսկ b -ն էլ իր հերթին՝ a -ի հետ: Նկատենք, որ “համաչափ” և “հակահամաչափ” բառերերը հակաճանդան են, քանի որ մեկի առկայությունը չի ենթադրում մյուսի բացառումը: Որևէ հարաբերություն կարող է օժտված լինել այս երկու հատկություններով միաժամանակ կամ բոլորովին օժտված չլինել դրանցից որևէ մեկով: Ակնհայտ է մի բան. հարաբերությունը չի կարող լինել միաժամանակ և՛ համաչափ և՛ հակահամաչափ, եթե այն պարունակում է ինչ-որ (a,b) զույգ, որի համար $a \neq b$:

Օրինակ. Տրված է $A = \{1,2,3,4\}$ բազմությունը: Պարզել, թե ստորև բերված համասեռ հարաբերություններից որոնք են համաչափ և որոնք՝ հակահամաչափ:

$$R_1 = \{(1,1), (1,2), (2,1), (2,2), (3,4), (4,1), (4,4)\}$$

$$R_2 = \{(1,1), (1,2), (2,1)\}$$

$$R_3 = \{(1,1), (1,2), (1,4), (2,1), (2,2), (3,3), (4,1), (4,4)\}$$

$$R_4 = \{(2,1), (3,1), (3,2), (4,1), (4,2), (4,3)\}$$

$$R_5 = \{(1,1), (1,2), (1,3), (1,4), (2,2), (2,3), (2,4), (3,3), (3,4), (4,4)\}$$

$$R_6 = \{(3,4)\}$$

.

Լուծում. R_2 և R_3 հարաբերությունները համաչափ են, քանի որ հարաբերությանը պատկանող բոլոր (a,b) -երի համար (b,a) ն մույնպես պատկանում է հարաբերությանը: R_2 -ի համար հարկավոր է միայն ստուգել՝ արդյոք $(2,1)$ և $(1,2)$ զույգերը ներգրավված են հարաբերության կազմում: R_3 -ի համար անհրաժեշտ է համոզվել, որ $(1,2)$ և $(2,1)$ զույգերը երկուսն էլ պատկանում են հարաբերությանը, այնուհետև մույնը համոզվել $(1,4)$ և $(4,1)$ զույգերի համար:

Ընթերցողը կարող է համոզվել, որ ներկայացված մյուս հարաբերություններից ոչ մեկն այլևս համաչափ չէ: Սրանում համոզվում ենք՝ հայտնաբերելով (a,b) զույգ, որի համար (b,a) համաչափ զույգը բացակայում է:

Ինչ վերաբերում է R_4, R_5 և R_6 հարաբերություններին, ապա նրանք բոլորն էլ հակահամաչափ են: Այդ հարաբերություններից յուրաքանչյուրի համար չկան a և b տարրերի այնպիսի զույգեր, որ $a \neq b$ և երկու՝ (a,b) և (b,a) զույգերը պատկանեն հարաբերությանը:

Ընթերցողը կարող է համոզվել, որ ներկայացված մյուս հարաբերություններից ոչ մեկն այլևս հակահամաչափ չէ: Սրանում համոզվում ենք՝ հայտնաբերելով (a,b) զույգ, որի համար $a \neq b$, սակայն (a,b) և (b,a) զույգերը ներգրավված են հարաբերության մեջ:

Օրինակ. Արդյոք “բաժանարար է” հարաբերությունը դրական թվերի բազմության վրա համաչափ հարաբերություն է: Արդյոք այն նաև անհամաչափ է:

Լուծում. Այս հարաբերությունը հակահամաչափ է, քանի որ $1|2$, սակայն $2 \nmid 1$. Այն հակահամաչափ է, քանի որ ցանկացած a և b դրական թվերի համար $a|b$ և $b|a$ երկու պայմանների բավարարման դեպքում $a=b$:

Ենթադրենք ունենք այնպիսի հարաբերություն ուսանողների (x,y) զույգերի համար, երբ x ուսանողն ավելի բարձր առաջադիմություն ունի, քան y ուսանողը: Ենթադրենք նաև, որ x -ը հարաբերության մեջ է y -ի հետ, իսկ y -ն էլ իր հերթին հարաբերության մեջ է z -ի հետ: Սա, իհարկե, նշանակում է, որ x -ն ավելի բարձր առաջադիմություն ունի, քան y -ը, և y -ն ավելի բարձր առաջադիմություն ունի, քան z -ը. Անվիճելիորեն, x -ն ավելի բարձր առաջադիմություն կունենա, քան z -ը, և սույնով, x -ը հարաբերության մեջ է z -ի հետ:

Սահմանում 6.3. A բազմության վրա սահմանված R հարաբերությունը կոչվում է **փոխանցելի**, եթե ցանկացած $(a,b,c) \in A$ համար տեղի ունի հետևյալը.
 $\{(a,b) \in R \text{ և } (b,c) \in R\} \rightarrow (a,c) \in R$:

Օրինակ. Տրված է $A = \{1,2,3,4\}$ բազմությունը: Պարզել, թե ստորև բերված համասեռ հարաբերություններից որոնք են փոխանցելի և որոնք՝ ոչ փոխանցելի:

$R_1 = \{(1,1), (1,2), (2,1), (2,2), (3,4), (4,1), (4,4)\}$

$R_2 = \{(1,1), (1,2), (2,1)\}$

$$R_3 = \{(1,1), (1,2), (1,4), (2,1), (2,2), (3,3), (4,1), (4,4)\}$$

$$R_4 = \{(2,1), (3,1), (3,2), (4,1), (4,2), (4,3)\}$$

$$R_5 = \{(1,1), (1,2), (1,3), (1,4), (2,2), (2,3), (2,4), (3,3), (3,4), (4,4)\}$$

$$R_6 = \{(3,4)\}$$

Լուծում. R_4, R_5 և R_6 հարաբերությունները փոխանցելի են: Այդ հարաբերություններից յուրաքանչյուրի համար կարող ենք պնդել, որ հարաբերությանը պատկանող բոլոր (a,b) և (b,c) զույգերի համար (a,c) զույգը նույնպես ներկա է: Օրինակ, R_4 -ը տարանցիկ է, քանի որ $(3,2)$ և $(2,1)$, $(4,2)$ և $(2,1)$, $(4,3)$ և $(3,1)$, $(4,3)$ և $(3,2)$ զույգերը միակ այդպիսի զույգերն են, և նրանց համար $(3,1)$, $(4,1)$ և $(4,2)$ զույգերը նույնպես ներկա են R_4 հարաբերության մեջ: Նմանապես, ընդերցողը կարող է համոզվել, որ R_5 և R_6 հարաբերությունները ևս փոխանցելի են:

R_1 -ը փոխանցելի չէ, քանի որ $(3,4)$ և $(4,1)$ զույգերը պատկանում են R_1 -ին, սակայն $(3,1)$ –ը չի պատկանում: R_2 հարաբերությունը փոխանցելի չէ, քանի որ $(2,1)$ և $(2,1)$ զույգերը պատկանում են R_2 -ին, սակայն $(2,2)$ –ը հարաբերությանը չի պատկանում: R_3 -ը նույնպես ոչ փոխանցելի է, քանի որ $(4,1)$ և $(1,2)$ զույգերը պատկանում են R_3 -ին, սակայն $(4,2)$ զույգը չի պատկանում:

Օրինակ. Արդյոք “բաժանարար է” հարաբերությունը բնական թվերի բազմության վրա փոխանցելի հարաբերություն է:

Լուծում. Ենթադրենք, որ a -ն b -ի բաժանարար է, իսկ b -ն իր հերթին c -ի բաժանարար է: Այդ դեպքում կարելի է գտնել այնպիսի k և m թվեր, որ $b=ak$ և $c=bm$. Այստեղից հետևում է, որ, $c=akm$, այնպես, որ a -ն c -ի բաժանարար է: Այստեղից հետևում է, որ տրված հարաբերությունը փոխանցելի է:

Օգտվելով երկու հարաբերությունների արտադրյալից՝ կարելի է սահմանել համասեռ հարաբերության աստիճան:

Սահմանում 6.4. Ենթ. R -ը A բազմության վրա տրված հարաբերություն է: Այդ դեպքում R հարաբերության աստիճանը՝ $R^n, n = 1, 2, 3, \dots$ կարող է սահմանվել մակածման մեթոդով՝ հետևյալ կերպ. $R^1 = R$ և $R^{n+1} = R^n \circ R$:

Սահմանումից հետևում է, որ

$$R^2 = R \circ R, \quad R^3 = R^2 \circ R = (R \circ R) \circ R, \text{ և այլն:}$$

Օրինակ. $R = \{(1,1), (2,1), (3,2), (4,3)\}$. Որոշել R^n , $n=2, 3, 4, \dots$

Լուծում. Քանի որ $R^2 = R \circ R$, ուստի $R^2 = \{(1,1), (2,1), (3,1), (4,2)\}$. Եվ քանի որ $R^3 = R^2 \circ R$, ապա $R^3 = \{(1,1), (2,1), (3,1), (4,1)\}$:

Շարունակելով գործողությունները՝ նկատում ենք, որ R_4 -ը նույնն է, ինչ որ R^3 -ը, այնպես որ $R^4 = \{(1,1), (2,1), (3,1), (4,1)\}$ Սրանից հետևում է, որ $R^n = R^3$ $n=5, 6, 7, \dots$

Հետևյալ թեորեմը ապացուցում է, որ փոխանցելի հարաբերության աստիճանը վերոհիշյալ հարաբերության ենթաբազմություն է:

Թեորեմ 1. R համասեռ հարաբերությունը A բազմության վրա փոխանցելի է այն և միայն այն դեպքում, երբ $R^n \subseteq R$, $n=1, 2, 3, \dots$

Ապացույց. Ենթադրենք, որ $R^n \subseteq R$, $n=1, 2, 3, \dots$ Մասնավորապես, $R^2 \subseteq R$. Որպեսզի համոզվենք, որ սրանից բխում է R -ի փոխանցելի լինելը, նկատենք, որ եթե $(a,b) \in R$ և $(b,c) \in R$, ապա, ըստ սահմանման, $(a,c) \in R^2$. Քանի որ $R^2 \subseteq R$, սա նշանակում է, որ $(a,c) \in R$. Ուստի՝ R -ը փոխանցելի է:

Ենթադրենք R -ը փոխանցելի է և մաթեմատիկական ինդուկցիայով ապացուցենք $R^n \subseteq R$: Նկատենք, որ թեորեմի այս մասը պարզունակ ձևով ճշմարիտ է $n=1$ դեպքի համար:

Համարենք, որ $R'' \subseteq R$, որտեղ n -ը դրական թիվ է: Սա ինդուկցիայի հիպոթեզն է:

Ավարտելու համար ինդուկցիայի քայլը, պետք է ապացուցել, որ R^{n+1} -ը նույնպես R -ի ենթաբազմություն է: Այդ նպատակով ենթադրենք, որ $(a,b) \in R^{n+1}$: Այդ դեպքում, քանի որ $R^{n+1} = R'' \circ R$, ապա գոյություն ունի այնպիսի $x \in A$ տարր, որի համար ճշմարիտ են $(a,x) \in R''$ և $(x,b) \in R$ պնդումները: Ինդուկցիայի հիպոթեզից՝ $R'' \subseteq R$, հետևում է, որ $(a,x) \in R$: Այնուհետև, քանի որ R -ը փոխանցելի է և հետևյալ երկու պայմանները բավարարված են՝ $(a,x) \in R$ և $(x,b) \in R$, հետևում է, որ $(a,b) \in R$: Սա ցույց է տալիս, որ $R^{n+1} \subseteq R$: Ինդուկցիայի քայլն ապացուցված է: Թեորեմն ապացուցված է:

Սահմանում 6.5. A բազմության վրա տրված R հարաբերության **անդրադարձ փակում** է կոչվում A բազմության վրա սահմանված այն նվազագույն անդրադարձ հարաբերությունը, որը ներառում է տրված R հարաբերությունը որպես ենթաբազմություն:

Համաչափ փակում է կոչվում A բազմության վրա սահմանված այն նվազագույն համաչափ հարաբերությունը, որը ներառում է տրված R հարաբերությունը որպես ենթաբազմություն:

Փոխանցելի փակում է կոչվում A բազմության վրա սահմանված այն նվազագույն փոխանցելի հարաբերությունը, որը ներառում է տրված R հարաբերությունը որպես ենթաբազմություն:

Ենթադրենք՝ R -ը A -ի մեջ տրված հարաբերություն է և $I = \{x: x = (a,a) \text{ բոլոր } a \in A \text{ համար}\}$: Այդ դեպքում՝

ա) $R \cup I$ -ն R հարաբերության անդրադարձ փակումն է:

բ) $R \cup R^{-1}$ -ն R հարաբերության համաչափ փակումն է:

գ) $\bigcup_{i=1}^{|A|} R^i$ -ն R հարաբերության փոխանցելի փակումն է:

7. Մասնակի կարգ

Սահմանում 7.1. S բազմության վրա սահմանված R հարաբերությունը կոչվում է **մասնակի կարգի հարաբերություն** կամ մասնակի կարգ, եթե այդ հարաբերությունն անդրադարձ է, հակահամաչափ և փոխանցելի:

S բազմությունն իր վրա սահմանված R հարաբերությամբ կոչվում է մասնակի կարգավորված բազմություն և նշանակվում է՝ (S, R) .

Օրինակ 1. Ապացուցել, որ “մեծ է կամ հավասար” հարաբերությունը՝ (\geq) , մասնակի կարգ է ամբողջ թվերի բազմության վրա:

Լուծում: Նկատենք, որ $a \geq a$ յուրաքանչյուր a -ի համար, ուստի՝ \geq -ը ռեֆլեքսիվ է: Եթե $a \geq b$ և $b \geq a$, ապա դա անպայմանորեն նշանակում է, որ $a=b$. Ուստի՝ \geq -ն հակահամաչափ է: Վերջապես, \geq -ն նաև տարանցիկ է, քանի որ $a \geq b$ և $b \geq c$ պայմանների բավարարումից հետևում է, որ $a \geq c$. Այստեղից հետևում է, որ \geq -ն մասնակի կարգ է ամբողջ թվերի բազմության վրա, իսկ (Z, \geq) -ը մասնակի կարգավորված է:

Օրինակ 2: Բաժանելիության հարաբերությունը՝ $|$, մասնակի կարգի հարաբերություն է դրական թվերի բազմության համար, քանի որ այն ռեֆլեքսիվ է, հակահամաչափ և փոխանցելի: Այլ կերպ ասած, $(Z^+, |)$ -ը մասնակի կարգավորված է:

Օրինակ 3. Ապացուցել, որ կամայական S բազմության ենթաբազմությունների $P(S)$ բազմության վրա տրված պարունակվելու հարաբերությունը մասնակի կարգի հարաբերություն է:

Լուծում: Քանի որ $A \subseteq A$ բոլոր այն A -երի համար, որոնք S -ի ենթաբազմություն են, ապա \subseteq փոխանցելի է: Այն նաև հակահամաչափ է, քանի որ $A \subseteq B$ և $B \subseteq A$ պայմանների բավարարումից հետևում է, որ $A=B$. Վերջապես, \subseteq -ը նաև փոխանցելի է, քանի որ $A \subseteq B$ և $B \subseteq C$ պայմանների բավարարումից հետևում է, որ $A \subseteq C$. Ուստի՝ \subseteq -ը մասնակի կարգ է $P(S)$ վրա, իսկ $(P(S), \subseteq)$ -ը մասնակի կարգավորված բազմություն է:

Նկատենք, որ մասնակի կարգի հարաբերության մեջ $a \leq b$ գրառումը նշանակում է, որ $(a, b) \in R$, և այդ նույն

գրառումն օգտագործվում է՝ նշանակելու համար ցանկացած մասնակի կարգ, այլ ոչ թե միայն “մեծ է կամ հավասար” հարաբերությունը: Օրինակ, ընդունված է մասնակի կարգավորված բազմությունը ներկայացնել որպես (A, \leq) :

Այն դեպքում, երբ a -ն և b -ն (S, \leq) մասնակի կարգի տարրեր են, ամենահին էլ անհրաժեշտ չէ, որ կամ $a \leq b$, կամ էլ՝ $b \leq a$ Օրինակ՝ $(P(Z), \subseteq)$ մասնակի կարգի մեջ $\{1, 2\}$ -ը չի հարաբերում $\{1, 3\}$ -ին և ընդհակառակը: Նմանապես, $(Z, |)$ - ի մեջ 2-ը չի հարաբերում 3-ին, և 3-ն էլ, իր հերթին, չի հարաբերում 2-ին, քանի որ $2 \nmid 3$ և $3 \nmid 2$. Սրանից հետևում է հետևյալ սահմանումը.

Սահմանում 7.2. (S, \leq) մասնակի կարգի a և b տարրերը կոչվում են **բաղդատելի**, եթե կամ $a \leq b$, կամ $b \leq a$. Եթե a -ն և b -ն S բազմության այնպիսի երկու տարրեր են, որոնց համար ոչ $a \leq b$ -ն տեղի ունի, ոչ էլ՝ $b \leq a$ -ն, ապա a -ն և b -ն կոչվում են **ոչ բաղդատելի**:

Օրինակ 4. Արդյոք 3 և 9 ամբողջ թվերը բաղդատելի են $(Z^+, |)$ մասնակի կարգի հարաբերության մեջ:

Լուծում: 3 և 9 ամբողջ թվերը բաղդատելի են, քանի որ $3 \mid 9$. Այնինչ՝ 5 և 7 ամբողջ թվերը բաղդատելի չեն, քանի որ, $5 \nmid 7$ և $7 \nmid 5$.

“Մասնակի” ածականն օգտագործվում է նկարագրելու համար տրված բազմության մասնակի կարգավորվածությունը, քանի որ հնարավոր է, որ բազմության ոչ բոլոր տարրերն են կարգավորված ըստ առաջադրված չափանիշի:

Այն դեպքում, երբ բազմության ցանկացած երկու տարր բաղդատելի են, այդպիսի բազմությունը վերանվանվում է հետևյալ կերպ.

Սահմանում 7.3. Եթե (S, \leq) -ը մասնակի կարգի է, և նրա ցանկացած երկու տարր բաղդատելի են, ապա S բազմությունը կոչվում է **լրիվ կարգավորված**, կամ՝ **գծային կարգավորված**, իսկ \leq հարաբերությունը կոչվում է **լրիվ կարգ** կամ **գծային կարգ**: Լրիվ կարգավորված բազմությունը կոչվում է նաև **շղթա**:

Օրինակ 5. (Z, \leq) մասնակի կարգավորված բազմությունը նաև լրիվ կարգավորված է, քանի որ կամ $a \leq b$ կամ էլ $b \leq a$, բոլոր այն a -երի և b -երի համար, որոնք ամբողջ թվեր են:


Օրինակ 6. $(Z^+, | \cdot |)$ մասնակի կարգավորված բազմությունը լրիվ կարգավորված չէ, քանի որ այդ բազմությունը պարունակում է ոչ բաղդատելի տարրեր, օրինակ՝ 5 և 7:

Լրիվ կարգավորված բազմության համար կարելի է ներկայացնել մեկ այլ որակավորում ևս.

Սահմանում 7.4. (S, \leq) մասնակի կարգի հարաբերությունը կոչվում է **լիովին կարգավորված**, եթե նրա կամայական ոչ դատարկ ենթաբազմություն ունի **նվազագույն** տարր: Մասնակի կարգի a տարրը կոչվում է **նվազագույն**, եթե այն փոքր է մասնակի կարգի մյուս բոլոր տարրերից, այսինքն, $a \leq b$ բոլոր $b \in S$ համար: Ակնհայտ է, որ նվազագույն տարրը միակն է: Նմանապես՝ մասնակի կարգի a տարրը կոչվում է **առավելագույն**, եթե $b \leq a$ բոլոր $b \in S$ համար:

Օրինակ 7. Դրական թվերի կարգավորված $Z^+ \times Z^+$ գույգերը, որոնց համար $(a_1, a_2) \leq (b_1, b_2)$ երբ $a_1 < b_1$, կամ՝ երբ $a_1 = b_1$ և $a_2 \leq b_2$ (լեզվաբանական կարգ), ներկայացնում են լավ կարգավորված բազմություն: Մինչդեռ, Z բազմությունը սովորական \leq կարգավորմամբ լավ կարգավորված չէ, քանի որ բացասական թվերի բազմությունը, որը Z -ի ենթաբազմություն է, չունի նվազագույն տարր:

Չեսսեի գծապատկեր: Մասնակի կարգավորված բազմությունների համար գոյություն ունի գրաֆիկական պատկերման միջոց, որը հայտնի է որպես Չեսսեի ուրվապատկեր: Տրված (S, \leq) մասնակի կարգավորված բազմության համար Չեսսեի ուրվապատկերը բաղկացած է կետերից և գծերից, որտեղ կետերը ներկայացնում են բազմության տարրերը, և եթե կամայական a և c տարրերի համար տեղի ունի $a \leq c$ պայմանը, ապա a տարրը տեղադրված է c -ից ներքև, և դրանք իրար հետ միացված են սլաքով, եթե գոյություն չունի այնպիսի b , որի համար $b \neq a, c$ և $a \leq b \leq c$:



Նկ. 2. Մասնակի կարգավորված երեք բազմությունների՝ $(\{1,2,3,4\}, \leq)$, $(\{1,3,6,9,15\}, |)$ և $(\{2,4,5,10,12,20,25\}, |)$ Հեսսեի ուրվապատկերներ

Նկար 2-ում ներկայացված առաջին երեք պատկերները վերաբերում են $(\{1,2,3,4\}, \leq)$ մասնակի կարգին: Բազմության տարրերից յուրաքանչյուրի շուրջը պատկերված օղակները ներկայացնում են անդրադարձ հարաբերությունը, իսկ սլաքները՝ համապատասխանաբար, հակահամաչափ և փոխանցելի հարաբերությունները:

Նկար 2-ի բ)-ե) տարբերակներում հեռացված են անդրադարձությունը ներկայացնող օղակները, իսկ գ)-ե) տարբերակներում՝ նաև փոխանցելիությունը ներկայացնող օղակները՝ նպատակ ունենալով չծանրաբեռնել ուրվապատկերը: Օղակների և սլաքների առկայությունը պարզապես ենթադրվում է:

Նկար 2-ի դ) տարբերակից երևում է, որ $(\{1,3,6,9,15\}, |)$ մասնակի կարգն ունի նվազագույն տարր և չունի առավելագույն տարր: Մինչդեռ ե) տարբերակում ներկայացված մասնակի կարգը ոչ առավելագույն, ոչ էլ նվազագույն տարր չունի:

Առաջադրանքներ

1. Տրված է $A=\{a,b,c,d\}$ բազմությունը: Բերված հարաբերություններից որոնք են ներկայացնում մասնակի կարգ:
 $\alpha) R=\{(a,a),(b,b),(c,d),(d,e),(e,e),(c,d),(a,b),(b,d)\}$
 $\beta) R=\{(a,a),(b,b),(c,d),(d,e),(e,d),(c,d),(a,b),(b,d)\}$
 $\gamma) R=\{(a,a),(b,b),(c,c),(d,d),(c,d),(a,b),(b,d),(a,d)\}$
2. Վերը նշված մասնակի կարգի համար, եթե կան այդպիսիք, կառուցել Հեսսեի ուրվապատկեր:
3. Ներկայացրեք կամայական մասնակի կարգի հարաբերություն, որտեղ բազմության տարրերը բաղդատելի են:
4. Ներկայացրեք կամայական մասնակի կարգի հարաբերություն, որտեղ բազմության որոշ տարրեր բաղդատելի չեն:
5. Նկարագրեք համաչափ հարաբերություն, որը միաժամանակ նաև մասնակի կարգ է:

8. Համարժեքության հարաբերություն

Այժմ ենթադրենք, որ համալսարանի ուսանողները մաթեմատիկայի օլիմպիադային նախապատրաստվելու համար գրանցվում են որոշակի մատյաններում: Ենթադրենք նաև, որ ուսանողների գրանցումը կատարվում է խիստ որոշակի ժամերին՝ ըստ նրանց ազգանվան սկզբնատառերի: Օրինակ՝ ազգանունների Ա-ից Թ, Ժ-ից Ս և Վ-ից Ֆ սկզբնատառերի համար գրանցումներն իրականացվում են համապատասխանաբար 09:00-ից մինչև 11:00, 11:00 -ից 13:00 և 13:00-ից 15:00 ժամերին:

Ընդունենք, որ R -ն այնպիսի հարաբերություն է, որը պարունակում է (x,y) զույգեր այն և միայն այն դեպքում, երբ x -ը և y -ը ազգանվան միևնույն տարանջատմամբ ուսանողներ են: Այդ դեպքում x -ը և y -ը կարող են գրանցվել միևնույն ժամին այն և միայն այն դեպքում, երբ (x,y) զույգը պատկանում է R -ին: Հեշտ է նկատել, որ R -ը ռեֆլեքսիվ է, համաչափ է և տարանցիկ: Ավելին, R -ը տրոհում է ուսանողների բազմությունը երեք տարանջատ դասերի՝ կախված նրանց ազգանվան սկզբնատառերից: Գիտենալու համար, թե հերթական ուսանողը որ ժամին կարող է

գրանցվել, մեզ մնում է ուղղակի պարզել, թե նրա ազգանունը վերոհիշյալ երեք դասակարգումներից որ մեկի է պատկանում՝ առանց պարզաբանելու ուսանողի ինքնությունը:

Ամբողջ թվերի բազմության մեջ երկու a և b թվեր “բաղդատելի ըստ modulo 4” հարաբերության մեջ են, երբ 4-ը բաժանում է $(a-b)$ -ն: Կարելի է համոզել, որ այս հարաբերությունը ռեֆլեքսիվ է, համաչափ է և փոխանցելի: Դժվար չէ նկատել, որ a -ն հարաբերում է b -ին այն և միայն այն դեպքում, երբ դրանք երկուսն էլ 4-ի բաժանվելիս ունեն միևնույն մնացորդը: Նման հարաբերությունը ամբողջ թվերի բազմությունը տրոհում է չորս տարբեր դասերի: Եվ եթե մեզ ուղղակի հետաքրքրում է որևէ թվի 4-ի բաժանման մնացորդը, այլ ոչ թե կոնկրետ նրա մեծությունը, ապա մենք ընդամենը պարզում ենք, թե տվյալ թիվը մնացորդների որ դասին է պատկանում:

Նշված երկու հարաբերությունները՝ R -ը և “բաղդատելի ըստ modulo 4”-ը, համարժեքության հարաբերությունների օրինակներ են, քանի որ դրանցից յուրաքանչյուրը ռեֆլեքսիվ է, համաչափ և տարանցիկ: Նման կարգի հարաբերությունները բազմությունը տրոհում են համարժեք տարրերով տարանջատ դասերի: Համարժեքության հարաբերություններն ի հայտ են գալիս ամեն անգամ, երբ մեզ հետաքրքրում է բազմության տրված տարրի պատկանելությունը համարժեքության որևէ դասի՝ անտեսելով տարրի մասնավոր արժեքն ու նշանակությունը:

Փաստորեն մենք ուսումնասիրում ենք համասեռ հարաբերության այնպիսի տեսակ, որը իր մեջ ներառում է հատկությունների առանձնահատուկ համադրում և որը թույլ է տալիս հարաբերության մեջ դնել իրարից լիովին տարբեր, սակայն, միևնույն ժամանակ, ինչ-որ չափանիշով նման տարրեր:

Սահմանում 8.1. A բազմության վրա սահմանված հարաբերությունը կոչվում է **համարժեքության**, եթե այն անդրադարձ է, համաչափ է և փոխանցելի: Երկու տարրեր, որոնք միմյանց հետ համարժեքության հարաբերության մեջ են, կոչվում են համարժեք:

Այլ կերպ ասած՝ եթե ցանկացած $a, b, c \in A$ տարրերի համար ստույգ են հետևյալ պնդումներից յուրաքանչյուրը,

ապա A բազմության համար սահմանված է համարժեքության հարաբերություն:

1. aRa
2. $aRb \rightarrow bRa$
3. $(aRb \wedge bRc) \rightarrow aRc$

Հեշտ է համոզվել, որ նշված պայմանները համարժեք են հետևյալներին.

$$i_A \subseteq R, R = R^{-1} \text{ և } R^2 = R:$$

Հետևյալ օրինակը մեկնաբանում է համարժեքության հարաբերության հասկացությունը:

Օրինակ 1. Ենթադրենք, որ R -ը հայերեն լեզվով նախադասությունների բազմության վրա սահմանված հարաբերություն է այնպես, որ aRb այն և միայն այն դեպքում, երբ $L(a) = L(b)$, որտեղ $L(x)$ –ը x նախադասության երկարությունն է: Արդյոք R -ը համարժեքության հարաբերություն է:

Լուծում: Քանի որ $L(a) = L(a)$, ապա aRa -ն տեղի ունի բոլոր նախադասությունների համար, ուստի՝ հարաբերությունն անդրադարձ է: Այժմ ենթադրենք, որ aRb տեղի ունի այնպես, որ $L(a) = L(b)$. Այդ դեպքում bRa -ն ևս տեղի ունի, քանի որ $L(a) = L(b)$: Հետևաբար, R -ը համաչափ է: Վերջապես, ենթադրենք, որ aRb և bRc պայմանները միաժամանակ տեղի ունեն: Այդ դեպքում ունենք, որ $L(a) = L(b)$ և $L(a) = L(c)$. Ուստի, $L(a) = L(c)$, այնպես որ aRc -ն ևս տեղի ունի: Հետևաբար, R -ը փոխանցելի է: R -ի անդրադարձությունից, համաչափությունից և փոխանցելիությունից հետևում է, որ այն համարժեքության հարաբերություն է:

Օրինակ 2. Ենթադրենք, որ R -ը հարաբերություն է ամբողջ թվերի բազմության վրա այնպես, որ aRb տեղի ունի այն և միայն այն դեպքում, երբ $a = b$ կամ $a = -b$. Ակնհայտ է, որ այդպիսի հարաբերությունն անդրադարձ է, համաչափ է և փոխանցելի: Հետևաբար, R հարաբերությունը իրենից համարժեքության հարաբերություն է:

Օրինակ 3. Ենթադրենք, որ R -ը հարաբերություն է իրական թվերի բազմության վրա այնպես, որ aRb տեղի

ունի այն և միայն այն դեպքում, երբ $a-b$ -ն ամբողջ թիվ է:
Արդյոք R -ը համարժեքության հարաբերություն է:

Լուծում: Քանի որ $a - b = 0$ -ն ամբողջ թիվ է բոլոր իրական a -երի համար, ուստի՝ aRa : Հետևաբար, R -ն անդրադարձ է: Այժմ ենթադրենք, որ aRb . Ուստի՝ $a-b$ -ն ամբողջ թիվ է, որից հետևում է, որ $b-a$ -ն ևս ամբողջ թիվ է, որտեղից հետևում է bRa , որը նշանակում է, որ R -ը համաչափ է: Եթե aRb և bRc , ապա $a-b$ -ն և $a-c$ -ն ամբողջ թվեր են: Հետևաբար, $a-c=(a-b)+(b-c)$ -ն նույնպես ամբողջ թիվ է, որից հետևում է, որ aRc . Սա նշանակում է, որ R -ը փոխանցելի է: Հետևաբար, R -ը փոխանցելի է, ուստի այն համարժեքության հարաբերություն է:

Օրինակ 4: Ենթադրենք, որ A -ն ամբողջ թվերի բազմությունն է, որի վրա սահմանված է $R \subseteq A \times A$ հարաբերությունն այնպես, որ $R = \{(a,b) : a-b=5k \text{ ինչ-որ } k \text{ ամբողջ թվի համար}\}$: Օրինակ՝ $(7,2) \in R$, քանի որ $7-2=5=5 \times 1$:

Նմանապես՝ $(-11,4) \in R$, քանի որ $-11-4=-15=5 \times (-3)$: Դժվար չէ նկատել, որ տրված հարաբերությունն անդրադարձ է, քանի որ յուրաքանչյուր $a \in A$ համար $a-a=0=5 \times 0=5 \times k$, երբ $k=0$, այնպես որ $(a,a) \in R$:

Տրված հարաբերությունը նաև համաչափ է: Ենթադրենք, որ $(a,b) \in R$. Այդ դեպքում գոյություն ունի այնպիսի ամբողջ թիվ՝ m , որի համար ճիշտ է հետևյալ պնդումը. $a-b=5m$, ուստի և՛ $b-a=-(a-b)=-(5 \times m)=5 \times (-m)$ ինչ-որ ամբողջ բացասական $(-m)$ համար: Ուստի՝ $(b,a) \in R$: Տրված հարաբերությունը նաև փոխանցելի է:

Ենթադրենք, որ a -ն, b -ն և c -ն թվեր են, որոնք բավարարում են $(a,b) \in R$ և $(b,c) \in R$ պայմաններին: Ըստ սահմանման, եթե $(a,b) \in R$, ապա $a-b=5k$ ինչ-որ k ամբողջ թվի համար, և եթե $(b,c) \in R$, ապա $b-c=5m$ ինչ-որ m ամբողջ թվի համար: Գումարելով այս երկու արտահայտությունները, կստանանք՝

$(a-b)+(b-c)=5k+5m=5(k+m)$ կամ՝ $a-c=5(k+m)$ ինչ-որ $k+m$ ամբողջ թվի համար: Հետևաբար՝ R հարաբերությունը համարժեքության հարաբերություն է:

Օրինակ 5. Ենթադրենք ունենք $a \equiv b \pmod{n}$, որտեղ $n > 0$ և $n \in \mathbb{N}$ կամայական n համար և $\mathbb{Z}^2 = \mathbb{Z} \times \mathbb{Z}$: Այդ դեպքում $a \equiv b \pmod{n} = \{(a,b) \in \mathbb{Z}^2 \mid \exists k | a-b=kx \text{ և } k \in \mathbb{Z}\}$:

Համարժեքության հարաբերությունը բազմությունը տրոհում է ենթաբազմությունների, որոնց տարրերը համարժեք են միմյանց և համարժեք չեն տրված բազմության այլ ենթաբազմությունների տարրերին: Համարժեքության հարաբերությունների ենթատեքստում այդ ենթաբազմություններն անվանվում են **համարժեքության դասեր**: R համարժեքության նկատմամբ:

Բազմության տրոհումը համարժեքության հարաբերության շնորհիվ կարելի է պատկերացնել հետևյալ կերպ.

Ենթադրենք՝ A -ն գույնզգույն գնդիկների հավաքածու է, իսկ R հարաբերությունն առաջադրված է հետևյալ կերպ. $(a,b) \in R$ այն և միայն այն դեպքում, երբ a -ն և b -ն միևնույն գույնն ունեն: Քանի որ հարաբերությունը համարժեքության է, ապա համարժեքության յուրաքանչյուր դաս բաղկացած կլինի միևնույն գույնի գնդիկներից:

Եթե R հարաբերությունն առաջադրված է հետևյալ կերպ՝ $(a,b) \in R$ այն և միայն այն դեպքում, երբ a -ն և b -ն միևնույն տրամագիծն ունեն, ապա համարժեքության յուրաքանչյուր դաս բաղկացած կլինի հավասար չափսերի գնդիկներից:

Եթե A -ն Հայաստանի բոլոր քաղաքացիների բազմությունն է, իսկ B -ն Հայաստանի մարզերի բազմությունը, ապա R -ը կարող էր ներկայացնել այնպիսի $a_1 \in A$ և $a_2 \in A$ քաղաքացիներ, որոնք ապրում են միևնույն $b \in B$ մարզում:

Սահմանում 8.2. Ենթադրենք, որ $a \in A$, և R -ը համարժեքության հարաբերություն է $A \times A$ վրա: Այդ դեպքում $[a]$ -ն հետևյալ բազմությունն է՝ $\{x : xRa\} = \{x : (x,a) \in R\}$, որը կոչվում է a -ն ներառող **համարժեքության դաս**: $[A]_R$ –ով կնշանակենք A բազմության բոլոր համարժեքության դասերը R հարաբերության նկատմամբ:

Օրինակ 5: Տրված է $A = \{1,2,3,4,5,6\}$ բազմությունը և նրա վրա սահմանված համարժեքության R_1 հարաբերությունը:

$R_1 = \{(1,1), (2,2), (3,3), (4,4), (5,5), (6,6), (1,2), (1,4), (2,1), (2,4), (3,5), (5,3), (4,1), (4,2)\}$

R հարաբերության նկատմամբ համարժեքության դասերը կառուցվում են A բազմության յուրաքանչյուր տարրի համարժեքության դասի որոշմամբ:

$$[1] = \{x : (x, 1) \in R_1\} = \{x : xR_1 1\} = \{1, 2, 4\},$$

որտեղ $1 \in [1]$, քանի որ $(1, 1) \in R_1$, $2 \in [1]$, քանի որ $(2, 1) \in R_1$, $4 \in [1]$, քանի որ $(4, 1) \in R_1$ և գոյություն չունի մեկ այլ $x \in A$ բազմությունից այնպիսին, որ $(x, 1) \in R_1$. Նմանապես ստանում ենք՝

$$[2] = \{x : (x, 2) \in R_1\} = \{2, 1, 4\};$$

$$[3] = \{x : (x, 3) \in R_1\} = \{3, 5\};$$

$$[4] = \{x : (x, 4) \in R_1\} = \{4, 1, 2\};$$

$$[5] = \{x : (x, 5) \in R_1\} = \{5, 3\};$$

$$[6] = \{x : (x, 6) \in R_1\} = \{6\}:$$

Արդյունքում ունենք միայն երեք համարժեքության դասեր՝

$$[1] = [2] = [4] = \{1, 2, 4\}$$

$$[3] = [5] = \{3, 5\}$$

$$[6] = \{6\}$$

այնպես որ՝

$$[A]_{R_1} = \{[1], [3], [6]\} = \{\{1, 2, 4\}, \{3, 5\}, \{6\}\}:$$

Օրինակից երևում է, որ համարժեքության դասի յուրաքանչյուր տարր ծնում է համարժեքության դաս: Այլ կերպ ասած, եթե $b \in [a]$, ապա $[a] = [b]$: Սա հիմք է տալիս պնդելու, որ համարժեքության դասի յուրաքանչյուր տարր համարժեքության դաս է:

Համարժեքության յուրաքանչյուր դաս պարունակում է նվազագույնը մեկ տարր, ուստի հարաբերության ռեֆլեքսիվության շնորհիվ a տարրին համարժեք բոլոր

տարրերի բազմությունը պետք է պարունակի a -ն: Մյուս կողմից, ոչ մի տարր չի կարող պատկանել միաժամանակ երկու իրարից տարբեր համարժեքության դասերի:

Օրինակ. Դիտարկենք Z ամբողջ թվերի բազմության վրա սահմանված է $R \subseteq A \times A$ հարաբերությունը որպես $R = \{(a, b) : a - b = 5k \text{ ինչ-որ } k \text{ ամբողջ թվի համար}\}$: Քանի որ ինչ-որ k ամբողջ թվի համար ճիշտ են հետևյալ պնդումները,

$$\begin{aligned} [a] &= \{x : (x, a) \in R\} = \{x : xR_a\} = \\ &= \{x : x - a = 5 \cdot k\} = \\ &= \{x : x = a + 5 \cdot k\} \end{aligned}$$

,

ապա կառուցում ենք հետևյալ համարժեքության դասերը,

$$\begin{aligned} [0] &= \{\dots, -15, -10, -5, 0, 5, 10, 15, 20, 25, \dots\} = \\ &= \dots = [-5] = [0] = [5] = [10] = [15] = \dots = \{x : x = 5k \text{ և } k \in Z\} \\ [1] &= \{\dots, -14, -9, -4, 1, 6, 11, \dots\} = \\ &= \dots = [-9] = [-4] = [1] = [6] = \dots = \{x : x = 1 + 5k \text{ և } k \in Z\} \end{aligned}$$

$$[2] = \{\dots, -13, -8, -3, 2, 7, 12, \dots\} =$$

$$\begin{aligned} &= \dots = [-3] = [-2] = [7] = [12] = \dots = \{x : x = 2 + 5k \text{ և } k \in Z\} \\ [3] &= \{\dots, -12, -7, -2, 3, 8, 13, \dots\} = \end{aligned}$$

,

$$= \dots = [-2] = [3] = [8] = [13] = \dots = \{x : x = 3 + 5k \text{ և } k \in Z\}$$

,

$$[4] = \{\dots, -11, -6, -1, 4, 9, 14, \dots\} =$$

$$= \dots = [-6] = [-1] = [4] = [9] = \dots = \{x: x = 4 + 5k \text{ և } k \in \mathbb{Z}\}$$

որոնք ներկայացնում են \mathbb{R} հարաբերության նկատմամբ իրարից տարբեր համարժեքության դասեր:

Այսպիսով,

$$[A]_{\mathbb{R}} = \{[0], [1], [2], [3], [4]\}$$

Համարժեքության $[0]$ դասի տարրերը միմյանց “նման են” այն իմաստով, որ դրանցից յուրաքանչյուրը հնգապատիկ է: Համարժեքության մյուս դասերի տարրերը նույնպես “նման են” այն իմաստով, որ դրանցից յուրաքանչյուրը հինգի բաժանելիս ունեն միևնույն մնացորդը:

Այսպիսով, համարժեքության դասերի համախումբը տրոհում է ամբողջ A բազմությունը չհատվող կամ փոխադարձաբար բացառող ոչ դատարկ ենթաբազմությունների, որը կոչվում է A -ի **տրոհում**:

Թեորեմ. A բազմության վրա տրված կանայական R համարժեքության հարաբերություն միարժեքորեն որոշում է A բազմության տրոհում՝ R -ի համարժեքության դասերին համապատասխան տրոհումը: Եվ հակառակը, A -ի կանայական տրոհման միարժեքորեն համապատասխանում է A -ի վրա տրված համարժեքության R հարաբերություն:

Առաջադրանքներ

1. Պարզել՝ արդյոք տրված A բազմության վրա սահմանված հարաբերությունները համարժեքության հարաբերություններ են:

ա) A - ն ամբողջ թվերի բազմությունն է, իսկ R –ը հարաբերություն է՝ տրված հետևյալ պայմանով.

$$(a, b) \in R, \text{ եթե } a + b = 0$$

բ) A - ն ամբողջ թվերի բազմությունն է, իսկ R –ը հարաբերություն է՝ տրված հետևյալ պայմանով.

$$(a, b) \in R, \text{ եթե } a + b = 5$$

գ) A - ն հարթության վրա բազմությունն է, իսկ R –ը հարաբերություն է՝ տրված հետևյալ պայմանով.

$(a,b) \in R$, եթե a և b ուղիղները հատվում են:
 դ) A -ն հարթության վրա բազմությունն է, իսկ R -ը
 հարաբերություն է՝ տրված հետևյալ պայմանով.
 $(a,b) \in R$, եթե a և b ուղիղները զուգահեռ են:

Գրականություն

1. Տոնոյան Ռ.Ն., Դիսկրետ մաթեմատիկալի դասընթաց
(դասախոսություններ և առաջադրանքներ):
Եր. ԵՊՀ., 1997
2. Տոնոյան Ռ.Ն., Դիսկրետ մաթեմատիկալի դասընթաց
(դասախոսություններ և առաջադրանքներ):
Եր. ԵՊՀ., 1982
3. J.A.Anderson, Discrete Mathematics with
Combinatorics, Prentice Hall, Upper Saddle River,
New Jersey 07458.

Բովանդակություն

1. Բազմության հասկացություն.....	4
2. Գործողություններ բազմությունների հետ.....	9
3. Բազմությունների նույնական ձևափոխություններ..	13
4. Ընդհանրացված միավորումներ և հատումներ.....	13
5. Բինար հարաբերություններ.....	15
6. Հարաբերությունների հատկությունները.....	20
7. Մասնակի կարգի հարաբերություն.....	27
8. Համարժեքության հարաբերություն.....	31

Բազմությունների տեսություն և
բինար հարաբերություններ
Ուսումնական ձեռնարկ

Եղիսաբեթ Ալավերդյան

Теория множеств и
Бинарные отношения

Егисабет Алавердян